

Þeir aftur á móti, sem hafa flultz hingað á unga aldri, eða eru fæddir hér af íslenzkum foreldrum draga sína andlega næringu mestmegin frá hinum enskumælandi þjóðum. Að vísu eru nokkrir til, sem hægt er að segja um, að þeir geti notað sér jafnt það sem kemur frá hinni íslenzku þjóð, sem það er kemur frá enskumælandi þjóðum, en tiltölulega eru þeir ekki margir sem það geta gert svo full not séu að. Þetta ástand er óhjákvæmilegt en það veldur því, að í voru vestur-íslenzka þjóðlifi, ef þjóðlíf má kalla, eru erfiðleikar til, sem ekki þekkjast þar sem um eitt mál og eina þjóðernistilfinningu er að ræða.

Skáldskapurinn hefir æfinlega verið og er ennþá einn blómlegasti reiturinn í hinum andlega akri íslenzku þjóðarinnar. Það er því engin furða þó vér Vestur-Íslendingar séum auðugir af honum. Vitaskuld er ekki helmingurinn af öllu því sem hér er ort verulegur skáldskapur, ef dæma má eftir því sem á prenti birtist, og vér eignum jafnvel ekki nema eitt stórkáld. En það er fleira skáldskapur en það sem stórkáldin yrkja, og meira að segja, það er fleira góður skáldskapur. Efnisríkum og frumlegum hugsunum, klæddum í verulegan skáldlistar búning bregður víða fyrir í mörgu sem hér er ort af mönnum, sem ekki eru nein stórkáld, en hafa þó hina eiginlegu skáldskapargáfu. Hitt er því miður satt, að mikil er til af leirburði, sem ekki hefir vitund af sann skáldskaparlegu gildi. En þeir sem athugalir eru geta séð talsvert af hreinu gulli í soranum.

Skáldskapur vor Vestur-Íslendinga er allur í bundnu máli. Sögur eða leikrit hafa ekki verið samin hér svo teljandi sé, Á meðan skáldskapurinn er allur í ljóðum er mjög hætt við að stór efni séu ekki valin til meðferðar. Flest stórkáld hafa ekki látið sér nægja ljóðagerðina eina. Sem dæmi má nefna Shakespeare, Goethe og Ibsen. Ljóðskáldskapurinn er sú skáldskapartegund, sem erfiðast er að láta sýna stórar og glöggar myndir úr mannlífinu, þar sem einstaklingarnir lifa hver sínu eigin lífi, en samt sem áður mynda eðlilega heild. Auðugar skáldskapar bókmentir geta þess vegna ekki verið til þar sem að skáldin eru eingöngu ljóðskáld. Þess vegna er hætt við að skáldskapur vor Vestur-Íslendinga verði ekki í næstu framtíð stórum